

“Ўзбек геология қидирув” АЖ
ягона акциядорининг
2021 йил “18” сентябрь даги
3 -сонли қарорига

10-ИЛОВА

“ТАСДИҚЛАНГАН”

“Ўзбек геология қидирув” АЖ
ягона акциядорининг
2021 йил “18” сентябрь даги
3 -сон қарори билан

“ЎЗБЕК ГЕОЛОГИЯ ҚИДИРУВ” АКЦИЯДОРЛИК ЖАМИЯТИ ДИВИДЕНД СИЁСАТИ ТЎҒРИСИДАГИ НИЗОМИ

I. УМУМИЙ ҚОИДАЛАР

1. “Ўзбек геология кидирув” акциядорлик жамиятининг “Дивиденд сиёсати тўғрисида”ги ушбу Низоми (кейинги ўринларда – Низом) Ўзбекистон Республикасининг норматив-ҳуқуқий ҳужжатлари, “Ўзбек геология кидирув” акциядорлик жамиятининг (бундан буён - Жамият) Устави, Корпоратив бошқарув кодекси ва Жамиятнинг бошқа ички (локал) норматив ҳужжатлари асосида ишлаб чиқилган.

2. Жамиятнинг дивиденд сиёсати акциядорларнинг фаровонлигини оширишга ва Жамият капиталлашуви ўсишини таъминлашга қаратилган. Низом акциядорларни ва бошқа манфаатдор шахсларни Жамият дивиденд сиёсати ҳақида хабардор қилишни ўз мақсади деб билади.

Ушбу Низом Жамият Кузатув кенгашининг акциялар бўйича дивидендлар миқдори ва уларни тўлаш тартибига доир тавсияларни ишлаб чиқишга ёндашувини белгилашга мўлжалланган.

3. Жамиятнинг дивиденд сиёсати муайян давр учун ишлаб чиқилади. Ушбу давр давомида жамиятнинг захира фонди жамият уставида белгиланган миқдорга етгунига қадар соф фойданинг 5 фоиздан кам бўлмаган миқдорда ҳар йилги мажбурий ажратмалар ажратилади. Жамият уставида белгиланган, аммо Жамият устав фонди (устав капитали)нинг ўн беш фоизидан кам бўлмаган миқдорда захира фонди ташкил этилади.

Соф фойданинг қолган қисми дивиденд тўловларига, капитализация қилиш шарти билан жамиятни ривожлантиришга ва акциядорлар умумий йиғилиши (ягона акциядор) қарори асосида бошқа мақсадларга йўналтирилади.

4. Жамият капиталлашувнинг ўсишини акциядорларнинг Жамият акцияларидан даромад олиш бўйича мулкӣ манфаатларини кондирининг асосий усули деб ҳисоблайди. Дивиденд сиёсати Жамият томонидан олинган фойданинг сарфланадиган ва капиталлаштириладиган қисмлари ўртасидаги мутаносибликни акцияларнинг бозор қийматини ошириш мақсадида оптималлаштиришга йўналтирилади.

5. Жамиятнинг дивиденд сиёсати қуйидаги асосий принципларга асосланади:

шаффофлилик принципи дивиденд сиёсатини амалга оширишда иштирок этадиган томонларнинг мажбуриятлари ва жавобгарлиги тўғрисидаги ахборотни, шу жумладан дивидендлар миқдори ва уни тўлаш тўғрисида қарор қабул қилиш тартиби ва шартларини белгилашни ва ошқор этишни кўзда тутлади;

долзарблик принципи дивиденд тўловларини амалга оширишда вақтинчалик чегараларни белгилашни аңглатади;

асослилик принципи дивидендларнинг миқдори ва тўлаш ҳақида қарор фақат Жамият томонидан ижобий молиявий натижага эришилган тақдирда Жамиятнинг реал молиявий ҳолатидан келиб чиқиб, унинг ривожлантириш режалари ва инвестиция дастурларини ҳисобга олган ҳолда қабул қилиниши мумкинлигини аңглатади;

ҳолислик принципи дивидендлар тўлаш, дивидендлар миқдори ва уларни тўлаш тартиби тўғрисида қабул қилинадиган қарорлар ҳақида ахборотни олишда акциядорларнинг тенг ҳуқуқлилигини таъминлашни аңглатади;

кетма-кетлилик принципи дивиденд сиёсати таомилларини ва тартиб-таомилларини қатъий бажаришни аңглатади;

ривожланиш принципи дивиденд сиёсатини корпоратив бошқарув тартиб-таомилларини янада яхшилаш доирасида доимий равишда такомиллаштиришни ва

унинг ҳолатини Жамиятнинг стратегик мақсадлари ўзгариши муносабати билан қайта кўриб чиқишни аниқлатади;

барқарорлик принципи Жамиятнинг дивиденд тўловларининг барқарор даражасини таъминлашга интилишини аниқлатади.

6. Жойлаштирилган акциялар бўйича дивидендлар тўлаш тўғрисида қарор қабул қилиш (эълон қилиш) Жамиятнинг ҳуқуқи ҳисобланади. Акциядорларнинг умумий йиғилиши (Ягона акциядори) акциялар бўйича дивидендлар тўлаш ёки тўламаслик тўғрисида қарор қабул қилишга ҳақли.

7. Жамият эълон қилинган дивидендларни тўлаши шарт.

Дивидендлар тўлаш билан боғлиқ харажатлар (шу жумладан, солиқ харажатлари, дивидендлар тўлаш билан боғлиқ почта харажатлари) бошқарув органлари қарорларига кўра дивиденд олаётган акциядор зиммасига юкланмаслиги лозим. Жамият ушбу мажбуриятни бажармаганлиги учун акциядорлар олдида Ўзбекистон Республикасининг қонун ҳужжатларига мувофиқ жавобгар бўлади.

8. Дивидендлар:

жойлаштирилмаган акциялар бўйича;

Жамият томонидан олинган ва/ёки қайта сотиб олинган акциялар бўйича;

Ўзбекистон Республикасининг қонун ҳужжатларида назарда тутилган бошқа ҳолларда ҳисобланмайди ва тўланмайди.

9. Жамият “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги Ўзбекистон Республикаси Қонунининг 54-моддасида назарда тутилган ҳолларда акциялар бўйича дивидендлар тўлаш тўғрисида қарор қабул қилишга ҳамда дивидендлар тўлашга ҳақли эмас.

II. ДИВИДЕНДЛАРНИ ҲИСОБЛАШ ВА МИҚДОРНИ БЕЛГИЛАШ ТАРТИБИ

10. Жамият молиявий йилнинг биринчи чораги, ярим йиллиги, тўққиз ойи натижаларига кўра ва (ёки) молиявий йил натижаларига кўра, ушбу Низомнинг 8-бандида кўрсатилган акциялардан бошқа акциялар бўйича дивидендлар тўлаш (эълон қилиш) тўғрисида қарор қабул қилишга ҳақли.

Дивидендлар Жамиятнинг Жамият тасарруфида қоладиган соф фойдасидан ва (ёки) ўтган йилларнинг тақсимланмаган фойдасидан тўланади. Имтиёзли акциялар бўйича дивидендлар Жамиятнинг бунинг учун махсус мўлжалланган фондлари ҳисобидан ҳам тўланиши мумкин. Бунда дивидендларни ўз вақтида тўлаш ва дивидендларни тўлаш учун айланма маблағлар ҳисобидан олинган маблағлар эвазига Жамият молиявий ҳолатининг ёмонлашишининг олдини олиш мақсадида Жамият томонидан Жамият даромади ҳисобидан умидсиз дебиторлик қарздорлиги бўйича заҳира ташкил этилади.

11. Акциядорларнинг умумий йиғилиши акцияларнинг ҳар бир тури бўйича дивидендлар тўлаш (эълон қилиш) тўғрисида қарор қабул қилади. Жамият Кузатув кенгаши акциядорларнинг умумий йиғилишига акциялар бўйича дивидендлар миқдори ва уни тўлаш тартиби тўғрисида тавсиялар киритади. Дивидендларнинг миқдори Жамият Кузатув кенгаши томонидан тавсия этилган миқдордан кўп бўлиши мумкин эмас.

12. Акциядорлар умумий йиғилишининг дивидендлар тўлаш (эълон қилиш) тўғрисидаги қарорида қуйидагилар кўрсатиб ўтилиши шарт:

дивидендлар тўланадиган (эълон қилинадиган) акциялар тоифаси(тури);
муайян турдаги битта акцияга ҳисобланган дивиденд миқдори;

дивидендлар тўлаш муддати, тартиби ва даврийлиги.

Бунда Жамият конун ҳужжатларида белгиланган ҳолларда ва муддатларда оддий акциялар бўйича дивидендларни тўлиқ тўлаш имкони бўлмаганда, дивидендлар ҳисоблаш (тўлаш) тўғрисида қарор қабул қилишга ҳақли эмас.

13. Акциядорлар умумий йиғилишига тавсия этиладиган акциялар бўйича дивидендлар микдори Жамият Кузатув кенгаши томонидан қўйидаги омиллардан келиб чиққан ҳолда белгиланади:

ишончлилиги аудиторлик ҳулосаси билан тасдиқланган молиявий ҳисобот маълумотларига мувофиқ соф фойданинг микдоридан;

Жамиятнинг кейинги даврларга мўлжалланган молия-ҳўжалик режаларидан;

Жамиятнинг тегишли давр якунидаги айланма маблағлари тузилмасидан;

Жамиятнинг тегишли давр якунидаги қарздорлиги ҳажмидан.

14. Кузатув кенгаши тавсия этиладиган дивидендлар микдорини белгилашда Жамиятнинг кейинги даврларга мўлжалланган молия-ҳўжалик режаларини, Жамият мажбуриятлари ва айланма маблағларининг жорий ва келгусидаги ҳолатини инобатга олиши лозим. Кузатув кенгаши томонидан Жамият акциядорларининг умумий йиғилишига тавсия этиладиган дивидендлар тўлови Жамият томонидан қўшимча қарздорлик ёки кейинги даврларга мўлжалланган молия-ҳўжалик режаларида назарда тутилмаган бошқа сарф-харажатларни келтириб чиқармаслиги зарур.

III. ДИВИДЕНДЛАРНИ ТЎЛАШ ТАРТИБИ ВА МУДДАТЛАРИ

15. Жамият дивидендларни пул маблағлари ёки бошқа қонуний тўлов воситалари ёхуд Жамиятнинг қимматли қоғозлари билан тўлайди. Эълон қилинган дивидендлар миллий валютада тўланади ёки Жамият Ўзбекистон Республикаси норезидент акциядорининг ёзма талабига кўра унга ҳисобланган дивидендларни эркин айирбошладиган валютага айирбошлаб, маблағларни норезидент акциядор тақдим этган банк ҳисобварағига ўтказиб беради.

16. Дивидендларни тўлаш муддати акциядорларнинг умумий йиғилиши қарори билан белгиланади, бироқ акциядорларнинг умумий йиғилиши томонидан дивидендларни тўлаш тўғрисида қарор қабул қилинган кундан эътиборан 60 (олтмиш) кундан кеч бўлмаслиги лозим.

17. Жамият акциядорларнинг умумий йиғилиши томонидан белгиланган муддатларда қимматли қоғозлар эгалари ҳисобланган шахслар дивидендларни ололмаган тақдирда ушбу (талаб қилиб олинмаган) дивидендларни тўлашни давом эттиради. Талаб қилиб олинмаган дивидендларни тўлаш даври Жамият томонидан эълон қилинган дивидендларни тўлаш мажбуриятини бажариш муддати тугаган санадан эътиборан уч йилдан кўп бўлмаслиги керак.

18. Дивидендлар акциядорларнинг умумий йиғилиши томонидан белгиланган муддатларда Жамиятнинг айби билан тўланмаган (олинмаган) тақдирда тўланмаган (олинмаган) дивидендлар бўйича Ўзбекистон Республикаси Марказий банки томонидан белгиланган қайта молиялаштириш ставкаларидан келиб чиққан ҳолда пеня ҳисобланади. Тўланмаган (олинмаган) дивидендлар бўйича ҳисобланадиган пенялар микдори тўланмаган (олинмаган) дивидендлар микдорининг 50 фоизидан ортиқ бўлмаслиги керак.

19. Жамиятнинг ўз вазифаларини бажариш билан бирга акциядорлар билан ишлашни амалга оширадиган тузилмавий бўлинимаси Жамият бухгалтерияси билан биргаликда Жамият томонидан ушбу Низомда назарда тутилган дивидендлар

тўловини ташкил қилиш бўйича барча чора-тадбирлар қўрилишини мувофиқлаштиради ва амалга оширади.

20. Исталган акциядор Жамиятга акциялар бўйича дивидендлар ҳисоблаш тартиби тўғрисида, дивидендлар суммасига солиқ солиш ва ҳисоблаш тартиби тўғрисида ҳамда тўлаш шартлари тўғрисида ахборот тақдим этиш сўрови билан мурожаат қилишга ҳақли.

21. Акциядорларга дивидендларни тўлаш тўғрисида қарор қабул қилинган акциядорларнинг умумий йиғилишини ўтказиш учун шакллантирилган Жамият акциядорларининг реестрида қайд этилган шахслар акциялар бўйича дивиденд олиш ҳуқуқига эга.

22. Акциялар улушли мулкда бўлган ҳолларда, дивиденд белгиланган тартибда акциядорлар ўртасида уларнинг улушларига мутаносиб тарзда тақсимланади.

23. Акциядор ўз акцияларига бўлган ҳуқуқларини ҳисобга олиш бўйича хизматлар кўрсатувчи инвестиция воситачисини ва/ёки Қимматли қозғалар Марказий депозитарийсини ўзига оид маълумотлардаги ўзгаришлар ҳақида ўз вақтида хабардор қилиши шарт. Акциядор ўзига оид маълумотлар ўзгарганлиги ҳақидаги ахборотни тақдим этмаган ҳолларда, бунинг оқибатида акциядорга етказилган зарар учун унинг акцияларига бўлган ҳуқуқларини ҳисобга олиш бўйича хизматлар кўрсатувчи Марказий депозитарий ва/ёки инвестиция воситачиси жавобгар бўлмайди.

24. Акциядор ўз банк реквизитларини ёки дивидендлар ўтказиш учун манзилни нотўғри кўрсатган, ёхуд кўрсатилган реквизитлар ҳақида Жамиятга хабар қилмаган, ёхуд улар ҳақида ўз вақтида хабар қилмаган тақдирда, Жамият шунинг натижасида акциядорга етказилган зарар учун жавобгар бўлмайди. Ушбу бандда кўрсатилган сабабларга кўра акциядорнинг айби билан нотўғри ўтказилган дивидендлар суммаси Жамиятга қайтарилгандан кейин уларни аниқлаштирилган реквизитлар бўйича акциядорга ўтказиш уларнинг қайтарилишига ва тақрорий ўтказилишига кетган харажатлар чегирилиб қолинган ҳолда, амалга оширилади.

25. Жамият акциядорларга уларга тегишли бўлган акциялар бўйича даромадларни тўлашда солиқ агенти ҳисобланади ва Ўзбекистон Республикасининг амалдаги қонун ҳужжатларида белгиланган қимматли қозғалар бўйича олинган даромад учун солинган солиқларни чегирган ҳолда, ҳисобланган дивидендлар тўловини амалга оширади. Солиқ солишнинг белгиланган ставкалари қўлланилмайдиган акциядор Ўзбекистон Республикасининг амалдаги қонун ҳужжатларида белгиланган тасдиқловчи ҳужжатларни Жамиятга (у томонидан жалб этилган Тўлов агентига) тақдим этади.

IV. ЭЪЛОН ҚИЛИНГАН ДИВИДЕНДЛАРНИ ТЎЛАШ БЎЙИЧА ЖАВОБГАРЛИК

26. Жамият акцияларнинг ҳар бир тури бўйича эълон қилинган дивидендларни тўлаши шарт.

27. Дивидендларни тўлашда акциядорларнинг ҳеч бири тўлаш муддатлари бўйича имтиёзга эга бўлмайди.

Жамият томонидан оддий акциялар бўйича ҳисобланган дивидендларни тўлаш акциядорларнинг дивиденд олишга бўлган тенг ҳуқуқлилигига риоя этган ҳолда амалга оширилади. Бунда Жамият, агар бунинг натижасида миноритар акциядорларга дивиденд тўлаш белгиланган муддатларда амалга оширилмаса, ийрик акциядорга дивидендлар тўлашга ҳақли эмас.

28. Жамиятнинг Ижроия органи Жамият акциядорларига дивидендларнинг тўлиқ ва ўз вақтида тўланиши учун жавобгар бўлади. Жамият Кузатув кенгаши Жамият Тафтиш комиссияси билан биргаликда Ижроия органининг ҳаракатларини назорат қилади.

29. Кузатув кенгаши ҳисобланган дивидендларни тўлашни таъминлаш мақсадида ўз мажлисларида дивидендлар тўланишининг бориши тўғрисидаги масалани кўриб чиқади. Жамият ижроия органининг айби билан дивидендлар тўлиқ ёхуд ўз вақтида тўланмаган ҳолларда, Кузатув кенгаши айбдор шахсларга жавобгарлик чораларини белгилайди ва тегишли санкцияларни қўллайди ёхуд уларни қўллаш ташаббусини киритади.

30. Жамият ўз мажбуриятларини бажармаган тақдирда, акциядорлар акцияларнинг ҳар бир тури бўйича эълон қилинган дивидендларни тўлашни суд тартибида талаб қилишга ҳақли.

31. Жамият Жамиятга юклатилган дивидендлардан солиқ суммаларини ушлаб қолиш ва ўтказиш бўйича солиқ агенти вазифасини бажармаганлик ёки зарур даражада бажармаганлик учун Ўзбекистон Республикаси қонун ҳужжатларига мувофиқ жавобгар бўлади.

V. АХБОРОТНИ ОШКОР ЭТИШ ТАРТИБИ

32. Ушбу Низом, шунингдек унга киритилган ўзгартириш ва қўшимчалар Жамият томонидан унинг корпоратив веб-сайтида Жамият бошқарув органининг тегишли қарор қабул қилинган мажлис баённомаси имзолангандан кейин ўн кун мобайнида ошкор этилади.

33. Акциядорларнинг умумий йиғилиши томонидан дивидендлар тўлаш тўғрисида қарор қабул қилинганда, Жамият муҳим фактлар тўғрисидаги хабарлар шаклидаги ахборотни қонун ҳужжатларида ҳамда Жамиятнинг Ахборот сиёсати тўғрисидаги низомида белгиланган муддатларда ошкор этади. Бунда Жамият томонидан акциядорларга уларга дивидендлар ҳисобланганлиги тўғрисидаги хабарнома электрон почта орқали юборилади.

34. Жамият томонидан дивидендлар тўлаш бўйича мажбуриятлар бажарилгандан кейин Жамият муҳим фактлар тўғрисидаги хабарлар шаклидаги тегишли ахборот қонун ҳужжатларида ҳамда Жамиятнинг Ахборот сиёсати тўғрисидаги низомида белгиланган муддатларда ошкор этади.

VI. ЯКУНИЙ ҚОИДАЛАР

35. Ушбу Низом, шунингдек унга киритилган ўзгартириш ва қўшимчалар акциядорларнинг умумий йиғилиши қарори билан тасдиқланади.

36. Ушбу Низомга ўзгартириш ва қўшимчалар Жамият Кузатув кенгаши, Жамият Тафтиш комиссияси, Жамият ички аудит хизмати аъзоларининг ҳамда Жамият Ижроия органи раҳбарининг тақлифига қўра киритилади.

37. Ушбу Низомнинг алоҳида бандлари Ўзбекистон Республикасининг амалдаги қонун ҳужжатларига ва/ёки Жамият Уставига зид келган тақдирда тартибга солинадиган муносабатларга нисбатан Ўзбекистон Республикасининг қонун ҳужжатлари ва/ёки Жамият Устави қоидалари қўлланилади.